



2020 LAMEPA

EKALLESIA FAAPOTOPOTOGA KERISIANO I AMERIKA SAMOA

LOMIGA MATI - APERILA

TOLOPŌ FONOTELE XXXIII IA IULAI 2021

ANOTUSI	
Fa'asilasilaga Ekalesia Aoao	1
Aufaigaluega Penisione 2020	1
Mai le Faatonu	2
Tusitusiga 40 tausaga EFKAS	3
Lauga	4
Faifeau/A'oa'o Agava'a Galuega Tausi 'Aulotu	6
Fanau ma Suiga Televavave	7
E Lelei Mo Oe	8
O e Manatua?	9
Vaiga Fou ona o le Coronavirus	9
Leai se mea e fou i lalo o le la	11
Galuega o le alofa	12
Iesu a'oa'o mai i le Tatalo	13

Ua tolopō le Fono Tele XXXIII sa fuafua mo Iulai 2020, e fa'ataunuu ia Iulai 2021! O le fa'aaliga lea a le afioga i le Ta'ita'ifono ia Fa'aeteete Saifoloi FT ma le Laulauafono, fa'apea le Komiti a Tamā o le Ekalesia i Samoa nei, ona o le malosi pea o le sosolo fa'aafi o le fa'ama'i o le coronavirus, o loo mafatia ma saisaitia ai nei lalolagi. Sa le faigofie ona faia leni i'uga ona o le tele o galuega a le Ekalesia Aoao e fa'amoemoe i le finagalo a le Fono Tele. Peita'i, sa manumalo lava le fa'atauaia o le nofo saogalemu ma le nofo puipuia o tagata o le Ekalesia mai leni fa'ama'i faigata.

O le tolopōina o le Fono Tele, na fa'ailoa mai i le tusi a le Failautusi Aoao, Nafatali Falealii FS, ia Aperila 24, 2020. O le lona tolu ai lea o tusi mai le Failautusi Aoao mo 'aulotu uma o le EFKAS talu ona fa'ateteleina le pipisi o le fa'ama'i i le lalolagi. Afai e lei maua sou kopi o ia tusi, e mafai ona e maua i luga o

'Au Toeaina ina ia aloa'ia pea ma fa'ataunuu pea le penisione i leni tausaga, mo le 'aufaigaluega galulue ua ato le 70 tausaga o le soifua. E tusa ai ma i'ugafono tumau a le 'Au Toeaina, e tatau ona o'atu i le ulua'i Aso Sa o le masina o Setema, ua fa'amavae ma malolo le faigaluega penisione mai le 'aulotu o loo galue ai. Ua i ai foi le fa'amoemoe, o le Fono Tele XXXIII lea ua faatulaga mo Iulai 2021, o le a patipatia ai ma fa'amanatu ai e le Ekalesia Aoao le soifua auauna o le 'aufaigaluega o le a penisione i leni tausaga.

Fa'ataunuu pea fonotaga a Komiti Tumau ma Mafutaga Lagolago:
 E fa'ataunuu pea le fonotaga a le Komiti a le 'Au Toeaina ia Iulai 2020. Ae afai o i ai se isi Komiti poo se Mafutaga e finagalo e fonotele i lea lava masina, ia vave fa'ailoa mai i le Ofisa Tutotonu ina ia fa'alauiloa ma fa'asalalau. Afai e le mafai ona saofia mai sui o Komiti/Mafutaga mai i fafo, o le a taumafai le Ofisa Tutotonu e fa'atulaga ni fesootaiga fa'anei ona po, ina ia mafai ona 'auai mai i fonotaga i luga o le upega tafailagi.

Fa'auuga a le Aoga Mauuluga i Kanana Fou:
 O Iuni 11, 2020, e fa'ataunuu ai le fa'auuga a le Aoga Mauuluga i Kanana Fou. O le fa'atinoga o le fa'auuga, o le a taoto atu i le susuga i le Pule Aoga ma le 'Aiga o Faiaoga, ina ia usita'ia tulafono mo le nofo puipuia mai le fa'ama'i o e pei ona poloa'i e le faigamalo o Amerika Samoa.

Fa'auuga a le Seminare Fa'afaifeau i Kanana Fou:
 E fa'ataunuu pea le fa'auuga a le Seminare Fa'afaifeau i Kanana Fou ia Iulai 11, 2020. O le fa'atinoga foi o le fa'auuga, o le a taoto atu i le susuga i le Peresitene ma le 'Aiga o Faiaoga, ina ia usita'ia tulafono mo le nofo

Fa'auuau itulau 2

le upega tafailagi i le tuatusi a le Ekalesia Aoao: <https://efkasonline.org>

O nisi o fa'aaliga mo le Ekalesia Aoao o loo fa'ailoa mai e le Failautusi Aoao i lana tusi, e aofia ai ni isi o fa'atonuga mo le fa'auauina o galuega a le Ekalesia ina ua tolopo le Fono Tele i leni tausaga. E aofia ai mea nei:

O Faiga Taulaga i leni tausaga:
 E toe fa'amanatu atu faiga Taulaga o leni tausaga ia fa'aoo mai i le Ofisa Tutotonu a o lei mae'a le masina o Me 2020. E mana'omia ona vave fa'amaopoopo lea fa'amoemoe, e fuafua ai e le Komiti o Tupe se paketi fa'aoopoopo mo leni tausaga fa'aletupe ua tolopō ai le Fono Tele.

Ia fa'amaopoopo pea le "Matagaluega Nite":
 E fautuaina Matagaluega ta'itasi ina ia fa'amaopoopo pea tulaga e pei ona masani ai le "Matagaluega Nite" mo leni tausaga, ma ia faao'oma'i i le Ofisa Tutotonu ae lei mae'a le masina o Iulai 2020. O le isi lea porokalama masani e fa'amoemoe ai galuega fa'atino a le Ekalesia.

Aloa'ia ma fa'ataunuu pea le Penisione a le 'Aufaigaluega i leni tausaga:
 E ui na tolopō le Fono Tele, ae ua finagalo le Komiti a le

'Aufaigaluega Penisione i le 2020

E ui na tolopō le Fono Tele i leni tausaga, a ua fa'ailoa mai le fa'auauina pea o le penisione a le 'Aufaigaluega i leni tausaga. O i latou nei ua agavaa mo le penisione i leni tausaga:

1. *Fiti Aofia FT – Aoa*
2. *Setefano Young FT – Kanana Fou (CA)*
3. *Kenape Eliapo FT – San Francisco (CA)*
4. *Tafu Afusia FS – Masefau*
5. *Atiliai Tofaeono FS – Malamalama (CA)*

Fa'amalo fa'afetai i nei fitafita o le Tele Lelei! Ua toe o se aga ona a'emalo lea o a outou faiva. Ia agalelei le Atua ma puipui malu lo outou soifua, e ofoina atu ai mo la ma lona finagalo i soo se ala.

Mai le Fa'atonu

E faatalofa atu le 'au-faitau a le Lamepa i le alofa o le Atua. Ua tuana'i Fepuari sa feagai ai i tatou ma savili malolosi ma lologa, o le siisii o le sami, o timuga na paulia ai o tatou auala. O nisi o auala ua solo mai o maa i mauga, ua pauu laau i luga o auala, ua pepe molī, ua faaletonu le vai, o fale ua tapunipuni i laupapa ma apa ma kapoleni, ae faafetai o loo malutia lo tatou ola i aao alofa o le Atua. O le vi'iga lea i le Atua ma le faaneetaga, ona o le faafogaina o talosaga tuuina atu i ituaso o puapuaga ua malutia ai lo tatou ola, ma o le viiga lea i le Atua e le aunoa..

Faafetai ona o le faatinoga a tagata galulue i le Mālō, i soo se vaipanoa e faatinoina ai o le auunaga mo le soifua manuia o tagata. E faapea le fono tatalo a le 'au-failotu, ina ia malutia le Atunuu ma ona tagata. E faapea lava lo tatou soifua, pe ā oo mai o mafatiaga, ona manatua lea o le Atua na faagaloina o ia e i tatou. O le tatalo a le tagata ma le agaga salamo, ma viia le Atua ma lona alofa e faavavau.

I le masina o Mati, o le, **“Valaauina o le tagata ma ona tiute ua faatufugaina ai e le Alii, ina ia fa'asoa atu i le lalolagi ma ona tagata, i mea uma ua tatou faia.”** O le fa'asoa a le Alii e pei ona faailoa mai i le lagi ma mea uma na ia faia, e faapea foi ona ta'uta'u atu e le tagata le silisiliese o le Atua ma mea ua ia molimauina. I le va'ava'ai atu a le tagata i fetu o le lagi ua pupula matagofie ma galulue faatasi, e pei o se 'āiga e tasi ua faailoa mai le silisiliese o le Atua, ma viia o lona suafa..

O le mātau a le tagata ma lona faatauvaa, e le oo i ai lona iloa peitai, o lea ua vaaia le silisiliese o le Atua ua faailoa mai. O le viiga i le Atua potu e toatasi, na ia faia o mea uma ma le tagata, i lona potu ma le atamai, o lana Upu fetalai ma faia ai mea uma mai le amataga, ua sulua le pogisa i le mal-amalama, o lea foi le Upu na faailoa e Ioane, “sa i le amataga le Upu, sa i le Atua le Upu, o le Atua lava o le Upu. O ia lava sa i le Atua i le amataga...”

E faapea foi lo tatou ola, ina ia avea le tagata ma tagata tausii mea lelei ina ia faaolaina le lalolagi, ma avea le lalolagi e manuia ai tagata uma. O le tagata e alofa i le ua ita mai, ia pa'i atu le alofa i tagata ua fia maua se fesoasoani, ia le avea oe ma tagata e faaogaina nisi e maua mai ai se tamaoiga, ia avea oe ma tagata e faailoa se mea e ona tupu ia te oe, ia faatino le amiotonu ma avea oe e te tautala i le faamasinogatonu, ia le avea oe ma tagata tau faasesē, a ia tasi le lotu ma le agaga, ia valaauina tagata e mafuta faatasi i le laulau e faasoa faatasi o mea'ai ua folasia, o le alofa ua faaolaina i tatou mai puapuaga.

O le vaaiga a le tagata, o tupe, ua vaevaeina ai tagata ma atunuu i le tamaoiga peitai, o le valaau ina ia tauave faatasi mafatiaga ma avega, ia faasao ma le atamai, o e faasaoa tutusa mo tagata uma, ia le avea ma tagata tau faasesē ia ofoina atu meaalofoa atina'e ai se mea lelei mo le Alii ma lana galuega, ia totogi lafoga i le mālō, faapea le ofoina atu o mea mo le Alii ma lana galuega.

O le vaaiga lona lua, o loo taoto atu i le faaiuga o Mati e oo atu ia Aperila, o tala i **Puapuaga o le Alii, ma lona oo atu i le nuu paia, o lona itagia ma sauaina, o lona maliu i**

luga o le satauro, o le tino ua faamomomoina ma le toto ua faamaligiina, o le foaina o lona tuugamau e Iosefa le Arimataia, ma le taeao o le Eseta, o le Alii ua Toetu mai i le aso tolu, o le taeao o le aso fou.

O le valaau a le Alii ina ia alafa'i i tatou i le aso fou, o le Atua na te faafoisia lo tatou ola, o le mamoe na foai mai e le Atua e osi ai le taulaga ma faaolaina ai o Isaako, o le auega i le alii ina ia faafogaina a tatou fesili i mea ua tuuina ai, o le valaau a le tagata i le alii ina ia fesoasoani mai, o le tagata e faia ana miti ma vaaia le silisiliese o le Atua ma alafai i le tatalo, o le manatua o lou tuana'i atoa ma le vaavaai atu i lou lumanai ma le faatinoga o le alofa, o le talitonuina faapea le onosai i puapuaga, o upu au-alofa ma le naunau o le auuna ona o le faatinoga o le galuega faatutua i le alofa, o le upu fiafia lea e le uma le viiga i le Atua, ona o tagata ua faatino lo latou ola ma le auunaga ua faatufugaina ai i latou e le Alii, e faasoa atu le auunaga i ona tuaoi.

O nisi ia o mea o loo faailoa mai e le Tusi Faitau Aso o Mati ma Aperila, o le tamaoiga o le Atua faasoa e ala ia Iesu, ina ia tumau atu lau tapuaiga i le viiga ma faatoesega, ma talotaloga, ma viia ai le Atua i lona alofa ma le agalelei.

O nisi o tusitusiga o le a faailoa atu e le 'au-tusitala a le Lamepa, mo lo outou silafia le tele o nisi mea taua. E faamalūlu atu, pe a faaletonu se upu i lau faitau, pe ua sala foi le pa i le fausaga, o le aufaigaluega e tua atu ia te outou, ma lo outou faatufugaga mai le Atua. Ia manuia tele nei masina i le alofa o le Atua.

Fa'auau mai itulau 1

TOLOPŌ FONŌ TELE XXXIII....

puipua mai le fa'ama'i o le coronavirus e pei ona poloa'i e le finagalo o Amerika Samoa.

Ta'utinoga mo A'oa'o Ulufale i Kanana Fou:

E fa'ataunuu pea le ta'utinoga a A'oa'o ulufale mo le Seminare i Kanana Fou, e fuafua mo Iulai 13, 2020. Afai e le saofia mai A'oa'o ulufale mai i Matagaluega i fafo, o le a taumafai le Ofisa Tutotonu e fa'atulaga ni fesootaiga fa'anei ona po, e fa'ataunuu ai lenei fa'amoemoe i luga o le uepa tafailagi.

Fa'auuga tofi Faifeau Samoa (FS):

Mo ē sa fuafua e fa'auina le tofi Faifeau Samoa i lenei tausaga, ia fa'aoo mai a outou ta'utinoga tusitusia i le Ofisa Tutotonu ae lei mae'a le masina o Iuni 2020. Silasila i luga o le website a le Ekalesia (<https://efkasonline.org>), o le a fa'aailo atu ai tulaga uma e mana'omia mo lea fa'amoemoe. A mae'a le iloilo o ta'utinoga o le a feagai ma le Komiti Galue a le 'Au Toeaina, ona taoto atu lea i Toeaina o Matagaluega e fa'auina tofi Faifeau Samoa, i se taimi talafeagai e fono ai le Matagaluega. O sui mai i Matagaluega i fafo e le saofia mai i le ta'utinoga, o le a taumafai le Ofisa Tutotonu e fa'atulaga ni fesootaiga fa'anei ona po, e fesootai mai ai i luga o le uepa tafailagi.

Fa'agafua pemeni FT03:29 mo le 3 masina:

O le tapunia o malumalu tapua'i mo le puipua o tagata lotu mai le fa'ama'i, ua faigata ai i 'aulotu ona fa'amaopoopo le tamaoaga sa masani ona fa'alagolago ai mo lona atina'e. Ona o lea, ua manatu le Laulauafono, o 'aulotu o loo 'auai i le porokalama fesoasoani a le Ekalesia, FT03:29, o le a fa'agafua a outou pemeni mo masina e 3, e amata ia Me 2020. O lona uiga, e tatau ona o'atu i le masina o Aokuso 2020, ua toe fa'auau a outou pemeni e pei ona masina ai.

O fa'aaliga ia sa fa'ailoa mai e le Failautusi Aoa i lana tusi, "Fa'aaliga Fa'alaua'itele #3 mo le EFKAS ona o le coronavirus (COVID-19)." Ua le faigofie lenei vaitau mo le Ekalesia ma lana galuega tala'i. O le fa'amoemoe la o ia fa'aaliga, ina ia fai ma ta'iala e fa'atonotonu ai le aga'i i luma o le Ekalesia i lenei vaitau a o faamalumalu mai pea le ataata o le fa'ama'i oti o le coronavirus o loo mafatia ai nei le lalolagi.

Amataga o le Seminare Fa'a-Faifeau i Kanana Fou

(O nai tusitusiga mai le tusi, 'Ina ia tatou iloa' - e fa'amanatu ai le 40 tausaga o le EFKAS i le alofa o le Atua.)

Ina ua mautinoa ua leai se avanoa o le EFKAS e a'oa'oina ai ana faifeau i Malua, ona manatu lea o le Au Toeaina e faagaoioi le amataina o Seminario Faafaifeau i Kanana Fou. O nisi o ia filifiliga, na amata nai i le 1982, e aofia ai se sailiga o se Pule, ma faiaoga, le sailia o le Vasega Faavae, faapea ai ma nofoaga ma fale..

O le fono a Toeaina ia Iuni 1982 i taimi o le Fono Tele, na filifilia ai Peti Viliamu Tofaeono, e avea ma uluai Peresetene o le A'oga. O Peti na iu mai i le a'oga faa-fomai i Fiti, na ulufale ma faau'uina mai Malua, na toe ulufale i le Andover Theological Seminary i Boston Amerika, sa avea ma Pule a'oga i le Kolisi Faa-faifeau i Malua 1972- 1976, ma toe talii i Los Angeles ma fa'auau le galuega faa-faifeau, lenei ua vala'auina e amata le A'oga fou, i Amerika Samoa.

O lenei foi fono a le Au Toeaina ia Iuni 1982, na filifilia ai le alii faifeau o Sekuni Sevaetasi, e avea ma Sui Peresetene o le A'oga. O le alo o Tutuila ma Manua, ua iu mai i Fiti ma faia'oga i le Kolisi Faafaifeau i Malua, na fa'auina mai le Univesite o Yale ma le fa'ailoga o le 'Masters of Sacred Theology'.

O le Fono tele faafuasei o Novema 22, 1982 na talia ai Elia Taase e avea ma faia'oga faavae i le a'oga faa-faifeau..Na iu mai i Fiti ma le faailoga o le BD, na faauu i Yale ma le faailoga o le Masters of Sacred Theology, na avea ma faia'oga i le Kolisi Faa-faifeau i Malua, Na avea ma Failautusi Aoa Fesoasoani i le FGFL mai ia Mati 1977 – 1981, na toe foi mai ma faia'oga i Malua i le 1982. Na filifilia e avea ma faia'oga i le Kanana Fou, o le taleni e a'oa'o ma tusitusi, i le va o Ekalesia mo feso'otaiga faa Oikumene.

O le Fono tele faafuasei ia Aukuso 24-26,1982, na faa-taatia ai se manatu ia fa'aigoa le Kolisi Faafaifeau o le "Kanana Fou Theological Seminary" E le gata i lea, aua talosagaina Fale o Pulega, o loo i ai mo le Kolisi.

O le filifiliga o le 'Vasega Fa'avae o le Seminare,' ina ua maua le Pule o le a'oga, na tofia ai le 'Komiti o le A'oga Faa-faifeau' e fesoasoani i fuafuaga uma mo le amataga o le a'oga.

Na fa'asalalauina le su'ega ulufale mo Ianuari 17-18,1983. E toa 100 i latou na sue, na o le 35 na manuia a latou suega. O le susuga a Peti na saunia le English, O Elia Taase na saunia le Feagaiga Tuai, ao Sekuini Sevaetasi na feagai ma le Feagaiga Fou.

O i latou na talia, na faia le Tautinoga i le Fale o le Au Uso ia Fepuari 10, 1983. **O Iuni 22,1983, na tatala aloaia ai le amataga o le 'Seminare Faafaifeau i Kanana Fou' ao aofia potopoto le Ekalesia i lana Fonotele.**

O lenei ua soifua ma ua ola le galuega a le Ekalesa, na amata i le 'Tipiloma' e faauuina ai Faifeau, lenei ua faauuina ma le 'Bachelor of Divinity', ua toatele foi fanau a le Ekalesia ua a'oa'oina mai Kolisi faafaifeau mai Atunuu i fafo ua faauuina ma 'Masters', ma 'PhD', ua foi mai ma galulue i le Kolisi. E faapea foi ona manatua **Pule A'oga a le Seminario**, le susuga ia Peti Viliamu Tofaeono, le susuga ia Ulusesa Sala, le susuga ia Elia Taase, le susuga ia Tafa Muasau, faapea le susuga ia Moreli Moreli Niuatoa, faapea Faia'oga o le Kolisi, faapea foi faifeau faiaoga sa galulue mo le atina'e o le a'oga.

O le olioli lea ma le viiga i le Alii e le aunoa, ao faamanuina lenei fa sefulu tausaga.o le EFKAS, i le alofa ma le agalelei o le Atua le Tama, le Alo ma le Agaga sa.

**L.Nuusila Samuelu, F.S. ThM,
Mai le Lamepa**

Nofoa ma Laulau e fia RENT
Fa'afesootai Komiti o Atinae...
Ph: 733-2338 / 256-8485
Taugofie tele
\$1.00 i le nofoa e tasi (i le aso)
\$5.00 i le laulau (i le aso)





LAUGA

Iese Faavaoga AKF



O le lauga i le suafa mamalu o le Atua le Tama, le Alo, le Agaga Paia. Amene.

Maua le matua i le Tusi o le Feagaiga Tuai Kenese 46: ua filifilia le fuaiupu e 3 & 4 e fai ma matua: **“Ona fetalai mai lea o ia, O a’u nei o le Atua, o le Atua o lou tama, aua e te fefe i alu ifo i Aikupito, aua ou te faia oe ma nuu tele....O a’u nei ta te o ifo ma oe i Aikupito, ou te toe aveina ae ai foi ia te oe, e tuu foi e Iosefa ona lima i luga o ou mata.”**

O le fetalaiga a le Atua ia Iakopo. O le fetalaiga o loo lalaga ai manatu o le tagata le mautonu. Le faaaliga a le Atua ia Iakopo, o loo atagia ai le lotolotoi faatasi o le Atua ma Iakopo. Ao saunoga tuusao a le Atua, e tali ai maufesili o loo le mautonu ai Iakopo i lona tuua o Kanana, ae agai atu i Aikupito. O le faaaliga, o loo manino ai folafolaga tuugutu a le Atua i augatama o Isaraelu.

E faapea Iakopo ma le sauni e malaga i Aikupito. E tele fesili ua oo i lona mafaufau, ua moomia se tagata e faasoa i ai, i le mea e ao ona fai. Ua tuua Kanana le nuu na folafolaina e le Atua e fai mo latou tofi, ae tilitioliola e feiloai ma Iosefa, sa faapea ua oti. Le mautonu Iakopo, aua o Kanana o loo i ai manuia o le Atua na folafola ia Apereamo. A faapefea ona alu ae tuu lo latou matuupalapa mai le Atua. Ae a manatu i le tala ua aumai o loo ola Iosefa, fai mai e te alu atu sei lua feiloai, ua atili ai ona le mautonu ona manatu. Iakopo ua le ese ma le vaa o Toilolo, ua leiloa pe alu i luma pe alu i tua. Faapefea ona faagalo Kanana na folafola e le Atua mo latou augatama. Ae a manatu foi i le atalii faapea ua oti, ao o loo ola, faapefea ona faagalo lona tofi mai le Atua. Lea na mafua ai ona afe Iakopo i Peresepa, e osi le taulaga i le Atua. O le uiga o le taulaga i le manatu o Iakopo, sei fesili i le Atua i lona le mautonu, e faaali mai le mea e ao ona fai. O Peresepa e tusa ai ma tala faamaumuina i le tusi a Kenese, e iloa ai le finagalo o le Atua, Le laueleele na faaigoa e Apereamo o loo i ai lona vaieli, na ia toto ai le ulu laau, ma valaau ai i le Atua ma ia nofo ai. Peresepa le malae o le faautugatagi e tatala ai le tofa mo le manuia o augatama o Isaraelu, lea foi ua tatala ai le avei a le Atua ma faaali ia Iakopo.

Tasi lea tala tulaga ese i le tusi a Kenese, e toatolu i latou o loo faasino i ai le tala, Apereamo, Isaako ma Iakopo ae tasi le Atua. O le faamasani o uluai augatama o Isaraelu ma le Atua, e faalogo ma faamanatu pea le Atua o le folafolaga. Le Atua na tautino ia Iakopo... **“ O au nei o le Atua, o le Atua o lou tama, aua e te fefe i alu**

ifo i Aikupito aua ou te faia oe ma nuu tele”. **“O au nei ta te o ifo ma oe i Aikupito, ou te toe aveina ae ai foi ia te oe, e tuu foi e Iosefa ona lima i luga o ou ata”.**

Le Atua e faaali i le tagata i taimi e le mautonu ai. Le Atua o loo fetalai tuusao ia Iakopo i le taimi nei, le Atua o le tuanai, sa ia folafola manuia i ona augatama. Le Atua e lotolotoi i ana folafolaga. Le Atua sa militino ma Iakopo, ma ia vaoia le fefe o Iakopo e alu i Aikupito. Fefe Iakopo nei fai ma ona lape lona le usitai i folafolaga a le Atua i ona augatama, aemaise o mea na tutupu, e pei o le olegia e Apereamo o Farao e le o sona toalua Sara o lona tuafafine, faatasi ma le taofi e le Atua o Isaako aua nei alu i Aikupito, ua sala la ina fefe Iakopo, nei tau i te ia nei mea uma. O le Atua e aveese ai le matafefe o le tagata faatuatua, ae faamanatu ia Iakopo folafolaga ia Apereamo, e ola i Aikupito ma nonofo ai, e fai foi latou ma nuu tele, ae toe faafoi lava e le Atua i Kanana. O fuafuaga a le Atua mo le tagata talitonu ma faatuatua, e leai se tasi na te iloa. O le Atua e sau e o faatasi ma Iakopo i Aikupito, ia talitonu le tagata, e i ai le Atua ma ana folafolaga. Iakopo ua alu fiafia e faafeiloai Iosefa, e ui ina ua puaoa lana vaai, ua o ma ona atalii ma ona afafine i Aikupito e feiloai ma le suli o le aiga, ua leva ona motusia le mafutaga. Na silafia e le Atua le manao o Iakopo, e fia feiloai ia Iosefa aua ua le toe umi aso o totoe o lona ola. Ia taunuu ai le faaliga a le Atua ia Iakopo i Peresepa, e tuu e Iosefa ona lima i luga o ona mata, o lona uiga e uma lona ola i lima o Iosefa. O le Atua e faaali mai i taimi tatou te le mautonu ai, pe afai tatou te faatuatua ma le faamaoni. O le taimi tatou te vaivai ai, e taua le fesili i le Atua i lona faaali mai moi tatou. O le Atua foi lea na faaali ia Iesu i le taimi na le mautonu ai, e tusa ma le tala a Luka i le feagaiga fou. O le tatalo a Iesu i le mauga o Olive, o le saili o Iesu i le Atua, ina ua vaivai i le mamafa o le galuega, lea na ia tatalo ai.

“Lou Tama e, ae finagalo i ai, ia e aveese lenei ipu ia te au, a e aua le faia lou loto, ao lou finagalo”.

Taunafai Luka e faamanino mai le sootaga a Iesu ma le Atua e ala i lona Agaga, soo se taimi e faatino ai e Iesu faamalologa, e fesili i le Atua e faaali mai lana faasinomaga mo ia. I le vaega sa faitauina i le Feagaiga fou, o loo atagia ai le faamamafa a Luka, i le fesili o Iesu i le Atua, lea foi ua manino mai i le toe taimi o le galuega a Iesu. Le galuega sa fetaii ma faigata, le taulamalama o le au tusiupu ma le au faresaio e fia fasioti ia Iesu, lea ua oo i toe taimi o lana galuega, ua lagona lona vaivai. Molimau Luka, ua tootuli Iesu ma tatalo i le Atua, faailoga o le tagata ua moomia moni sona

Atua i lona faaali mai i lona vaivai ma lona le mautonu. Na silafia lava e Iesu le taunuuga o lana galuega. Ao ona lagona faale-tagata, ua mafua ai ona vaivai ma le mautonu. A manatu i le oti o loo faamalumalu mai, o ai se a le vaivai lagona ma manatu. Fai mai Luka ua afutoto Iesu, ua sisina ifo i le palapala, faailoga o le tagata ua vaivai, ua mamafatu le galuega. Le ipu ua feagai ma Iesu, faamasinoga a le Atua i agasala a le lalolagi lea o le a ia tauamo, pau lea o lona toomaga, fesili i le Atua e faaali mai mo ia le mea e ao ona fai. Fai mai Luka, ua faaali le agelu ia Iesu ma faamalosi ia te ia, o le Atua lava lea ua ia ave le mautinoa ia Iesu e faauma ai lana galuega. Le Atua na faaali ia Iesu i taimi o lona vaivai, ma le mafatia, lea ua maua lona malosi e faauma ai lana galuega ina ua fesili i le Atua. O le Atua e faaali mai i taimi e le mautonu ai, na te aumai le mautinoa e tali ai lo tatou tuufesilisi. O le Atua e sau i le tagata i lona lava finagalo faitoatasi.

Le Ekalesia, o lea foi se faamanatu moi tatou. O le tatou fesili i le Atua, o lo tatou faasinomaga lea mo le tatou galuega. Ua le toe faigofie nei aso. Ua pesia i tatou i faamai eseese. Ua le toe tutusa le soifua tautua, ma le olaga tau faasoasoa e ala i le tamaoaiga. E i ai taimi tatou te vaivai ai, ua leai se loto onosai, se ola tauivi, ma le faamalosi. Ua galo ai i ai tatou o tatou o tagata auauna ma tautua mo le Atua ma lona finagalo. Tagata ua faaali mai i ai le Atua e ala i lona finagalo paia, e auauna i lana Ekalesia i tofiga ma faiva. O le oo mai o faamai pepesi, ma ua ave ma auala ua le mafai ai ona faatino nisi o faiga ma faiva alofilima o lana Ekalesia. Pau a lea o le tali, o le fesili i le Atua, na te faatonutonu folau mai i lana Ekalesia, ina ia tumau i le faatuatua faamaoni. Tatou te fesili, pe aisea ua oo mai ai nei faamai i le lalolagi, ma ua aafia ai uma tagata e oo lava i tagata lolotu ma tautua ma auauna i le Atua, o loo pagatia uma i lenei faamai. Ioe le Ekalesia, o le loloto o nei mafatiaga, o loo faapea ona lotolotoi ai le Atua. Le Atua lea na te tali i o tatou manaoga, na te aumai le toafamalie i taimi faigata o le olaga. Le uso e, o le auala tatou te manino ai i le faaali mai o le Atua, o le tatalo ma le faatuatua. Tatalo i le Atua o ia o le tumu atoatoa e maua ai le malosi e feagai ai ma le ola tautua. O le Atua e ana le galuega, o ia foi na te faaali mai lona mautinoa e faaauai ai le ola tautua i le Ekalesia. O le Atua foi lea e faaali i mai i taimi toamalie ma le solo lelei, ina ia tatou tumau ai pea i le onosai, tauivi, faapalepale.

O Iesu Keriso, na ofo atoatoa mai lona soifua e maliu i luga o le satauro, ma toe tu manumalo mai le oti ma le tuugamau, ina ia tatou maua le ola, ia maua atili ai pea lava Amene

MAFAUFAUGA FAALEAGAGA

Ua ila le lalolagi o tagata, ua popole ta'ita'i o atunuu ma malo, ua aafia foi ta'ita'i o talitonuga eseese faalelotu. A e sili ona faigata ma atuatuvaile ta'ita'i o aiga ma tagata ta'ito'atasi. O la le Tusi Paia, "E leai se mea e fou i lalo o le la." Na fausia le lagi ma le lalolagi i le amataga, faatasi ma le finagalo o le Atua Silisili Ese, "Ia lelei mea uma i lana silafaga." O le finagalo lava lea e tasi na soifua ma ola ai le ulua'i tagata, o Atamu ma Eva i le faato'aga. Peitai, na le usiusita'i ma le faalogo, a e faia pea o la loto---e masalosalo ma faalotolotua, e fesuisuia'i ma lē tumau i se lelei.

O le fe'au o le Tala Lelei mo lenei va i tausaga, o le taimi o le Etiveni, e faapea: "**E lelei o lo'o maua le avanoa.**" Tusi Paia: 1 Korinito 15:38, *O lenei, o'u uso pele e, ia outou tumau, ma le le faagaetia, ia alualu lo outou faamalosi i le galuega a le Alii ma le le aunoa, ina ia outou iloa e le se mea faaleaoga lo outou tautiga i le Alii.* Talofa i le aposetolo ta'uta'ua o Paulo ma lona loto naunau i le ekalesia na ia mafatia ma tigaina ai. O nai ana upu faamalosi a o le'i tapunia lana tusi i tagata o le ekalesia i le aai o Korinito, "...ia outou tumau ... faamalosi i le galuega a le Alii ... e le se mea faaleaoga lo outou tautiga I le Alii."

TUMAU!..Tumau i le a? I le galuega a le Alii o Iesu Keriso. Uso e i la Keriso, ua mae'a le ulua'i masina ma lona lua, o lea ua tatou amata lona tolu masina o le 2020--o tumau 'ea lou naunau ma lou loto fia auauna mo lou Alii o faapefea ona faa-TUMAU le lelei o lenei EFKAS? --- *Faamalosi i le galuega a le Alii.*

Le 'au faigaluega e: Faife'au, A'oa'o, Faletua, Tiakono---tagata lolotu uma o loo galulue e atia'e le Ekalesia a Iesu Keriso i nuu ma afio'aga.... *E lē se mea faaleaoga lo outou tautiga i le Alii.*

Tupulaga o tama ma teine o le Ekalesia, e taua lo outou tiute: ... *ia alualu lo outou faamalosi i le galuega a le Alii, ... ua leaga nei ona po.* Matua e, se'i tautuana le fanau, aua le tuulafoa'i i le fanau, ua le o toe saogalemu le olaga ua tatou i ai nei! Ia tatou faamalolosi e taofi le amiotonu ua finagalo ai le Alii. 'Aua le ave le tu'inanau ma pogai o le faavaivai, a ia faamalolosi e tau'ave ou tiute ma a'u foi faapei ona valaauina ai i tatou mo le Alii: IA OUTOU TUMAU I LE ALII.

Tomorrow may be the day of judgment. If it is we shall gladly give up working for a better future but not before. Bonhoeffer.

Saunia : Emau S. Petaia, F.S. Penisione

Lisi o Faifeau ma A'oa'o Kanana Fou agavaa mo le Galuega Tausi 'Aulotu

O le lisi leni o le 'aufaigaluega o ē o loo avanoa ma agavaa mo le galuega tausī 'aulotu. Ua saunia leni lisi ona o le finagalo o le Fono Tele (FT:16-26), e fesoasoani ai i 'aulotu o loo avanoa pea ma tau sailia se tasi e latou te osi feagaiga. O suafa ia, e le gata o le 'aufaigaluega o loo galulue nei mo le Ekalesia Aoa o Kanana Fou ma le Ofisa Tutotonu, a o i latou foi o loo galulue fa'amaoni i tua i 'aulotu ma Pulega, e pei ona tu'uina mai e Failautusi o Pulega. Afai e i ai se faigaluega agavaa e le o i ai lona suafa i le lisi, o lona uiga e lei o' mai lou suafa i le taimi sa tapena ai leni lisi, e pei ona talosaga ai i Failautusi o Pulega ta'itasi. O suafa ia o le 'aufaigaluega agavaa ma Pulega o loo galulue ai:

Seminare Faafaifeau i Kanana Fou:

*Timoteo Esekia FF, Resitala
 *Fepuari Logoleo FF
 *Palenapa Mataafa FF
 (*fa'amaonia e le 'Au Toeaina)

Ofisa o A'oa'oga Kerisiano:

Setefano P. Lefale FS, Fa'atonu
 Soosoo Tuiolomoti FS
 Segā Ifopo FS
 Pesamino Tuitea FS
 Vili Polikapo AKF
 Alama Solofa AKF

Lamepa:

Iese Faavaoga AKF
 Edward Semaia AKF

A'oga Maua'uga i Kanana Fou:

Uaea Satele FS
 Geoffery Tagaloa AKF

Pulega Fale-Ta'u:

Ioane Ioane AKF (Fitiuta)

Pulega Sa'ole:

Setefano P. Lefale FS ('Auasi)
 Vili Polikapo AKF (Amouli)
 Edward Semaia AKF (Aunuu)
 Siavao Iese AKF (Alofau)

Pulega Sua:

Pesamino Tuitea FS (Masausi)
 Ioane Peleti AKF (Fagaitua)
 Geoffery Tagaloa AKF (Laulii)
 Simeona Ape AKF (Laulii)

Pulega Fagalao:

Ierome Taii AKF (Pago Pago)

Pulega Tualauta:

Kirifi Muao FS (Pavaiai)
 Taafua Taafua FS (Iliili)
 Lancaster Allen AKF (Vaitogi)

Pulega Tualatai:

Segā Ifopo FS (Vailoatai)
 Daru Ulutu FS (Malaeloā)
 Alama Solofa AKF (Futiga)
 Sinaka Ulutu AKF (Malaeloā)

Pulega Alataua:

Roseti Faamausili FS (Nua Seetaga)
 Tasele Tuigamala FS (Leone)
 Soosoo Tuiolomoti FS (Poloa)
 Iese Faavaoga AKF (Leone)
 Fetuao Mua AKF (Leone)

Pulega Hawaii i Saute:

Take Sunia FS

Pulega San Francisco:

Moegagogo Tamasese FS
 Ketesemane V. Tagaloa FS
 Eliu Eseroma FS (Daly City)
 Vai Malaulu AKF
 Safue Ulufaleilupe AKF (Sacramento)

Pulega LA Saute:

Peniamina Sefo AKF (USC)
 Timothy Young AKF (Kanana Fou)

Pulega USO:

Ieremia Tyrell AKF (Tacoma)

Pulega Alaska i Matu:

Vaimoso Pasia FS (Lupe)
 Stephen Taule'ale'a FS (Alaska I)

Pulega Ausetalia:

Oto Tumanu FS (Alofisa o le Atua)

Lisi o 'Aulotu Avanoa

O nisi ia o 'aulotu a le EFKAS o loo avanoa i le taimi na lolomi ai leni LAMEPA, o le a aogā ai leni lisi:

- EFKAS Ofu
- EFKAS Utumea
- EFKAS Vailoatai
- EFKAS Leone
- EFKAS Nua & Seetaga
- EFKAS Alao
- EFKAS Harbor City
- EFKAS SCC
- EFKAS Fountain Valley
- EFKAS Mesa Margarita
- EFKAS Stockton
- EFKAS Sunnyvale

UA TATAU EA ONA 'APO FANAU MAI TĀFEGA O SUIGA TELEVAVAVE O NEI ASO?

Ua na o ni mafauauga ma se fesili e faatula'i - atonu e faatupu manatu.

Ua le tau faamatalaina i ni upu le tele lise ua i ai nei aso ma suiga ua tatou i ai. E ui i le tele o nei vaaiga, peita'i a talanoa i suiga, peisea'i ua vave ona oso mai i manatu ma laualuga lava le ta'ua o le tekenolosi ma fesootaiga faanei ona po, peitai tatou te le tuua'ia pito tasi e aunoa ma lo tatou faa tāua foi o aogā ua mafai ai ona vave faataunuu le tele o manaoga e ala i ia sao lelei ma aogā mo le olaga o aso uma. Ua mafai e nei suiga tele ona fesoota'i i se taimi vave ma puupuu, Aiga faaapea foi fanau ma uo i nuu mamao. O le toomaga vave mo le itu tau i a'oa'oga ma su'esu'ega manaomia(research), mo le faalateleina o le atamai ma le potu, e faapea foi i galuega, fesootaiga vave o faamatalaga ma ni faai'uga talafeagai mo galuega fai; (generation of information) o le totogiina o pili, faagaioiga o mataupu tau i Faletupe, momoliina o feau (e-meli) ma isi lava anoano ua faateleina le faigofie ma le vave.

Peita'i, soo se mea lelei lava ma tāua e fou i faatinoga ma lelei, e i ai foi ona itu e lamatia ai le solo lelei o mea sa masani mai ai, po o mea foi sa le i i ai i le amataga. Tatou amata ia i le telefoni e fai ma faata'ita'iga; O se tulaga faigofie lava, pe a toe to manatu i aso ua alu, e tasi lava si telefoni fale (land line) e tuu i luga o le laulau i le potu malolō, so o se taimi lava e tagai ai le telefoni a o i ai uma le Aiga, e iloa uma lava e Matua ma fanau faapea foi le auaga le tagata lea e vili mai, po o se feau foi mai Aiga i nisi nofoaga, po o e foi e aumau i atunuu mamao. E muamua lava fesili le toeaina po o le loomatua; O ai? tali se tasi o taliina le telefoni, O uncle Pai, po o Aunt Lafai, po o ai lava. A tatou tuu mai i aso nei, ua seāseā ona toe i ai ni telefoni i totonu o tatou fale, po o i ai, ae ua le toe vaaia foi ma faaogaina, ua tofua telefoni uma le auaga, mai e matutua e oo lava i fanau.

O le mea moni, ua le o toe silafia e Matua le anoano o tagata eseese o fesoota'i i ai le fanau, e le gata o nisi o Aiga, a o le tele o uo ma e ua masani ma le fanau. O le mea moni pei ona ua tatou iloa ma faamaonia i nei aso, ua le toe noatia le fesoota'i atu o a tatou fanau i e latou te masani, o uo i Aoga, o tafaoga, ma nisi lava e le o ma iloa.

O le tasi itu ua siitia le iloa saosaoa e fanau o telefoni ma masini faaonapo nei, ua iloa ai uma tulimanu ma vaega mamao ese o le lalolagi sa tatou leiloa muamua. O le toatele o Matua, latou te le o mulimuli ta'i ma iloa manino polokalame eseese o i totonu o nei masini po o telefoni, ae ua mafai e fanau ona fesoota'i, talanoa, matamata ma avea o ni faafiafiaga o aso uma. E moni o lo o fesoasoani nei fesootaiga i a latou suesuega ma sailiga mo a latou meaaoga peita'i, ua tele atu ai foi ma le avanoa, ua le o ma ua e Matua, tafa eseese o le lalolagi ma mea ua iloa atili ai foi e

le fanau, ma o le lasi o nei mea e pei o taaloga, ma nisi mea faafiafia, ua laasia ai foi ma tulaga ma polokalame o ata masoā, le talafeagai ma oo ai lava ina faigofie tele i fanau ona oo i nisi laasaga pei o tulaga tau feusua'iga ma amioga le talafeagai ma i latou. O mea o tutupu fafo atu o le li'o o le Aiga, ma mea o a'oa'o ai fanau. A tatou tulimata'i le lasi o faatosina o nei suiga ma mea faafiafia ua lofia ai a tatou fanau, ua le gata ina le fetagofi lelei ai e fai ni feau ma tiute masani pei na faatonuina ai e Matua, ae ua alu lo latou taimi ma faasolo ina āvaga ma avea ma mea suamalie ma ua oo ai lava ina faigata ai ona tuu; (addict).

O se tasi o a'oa'oga faale Autalavou sa talanoa ai lea mataupu i se taimi e le i mamao atu, na tula'i ai se tasi o tino matua o le Autalavou ma ia faaaliga manino le tulaga lenei, atonu e faamaonia foi e le au faitau:- Fai mai le faaaliga ma se mau a lenei totino matua o le autalavou; "O aso nei i tama ma teine talavou, afai ae taunuu i le Falesa ua galo le Tusi Paia a o sauni mo le lotu, e le taitai ona toe fo'i i le fale e aumai le Tusi Paia, ae afai e taunuu le tama po o le teine talavou i le Falesa, ae ua galo le telefoni, po o le uaea lea e tuu i le taliga e faalogologo ai le telefoni, o le mea mautinoa lava, e toe tula'i lelei lava ma toe fo'i i le fale e aumai mea ia".

E faamasino mai e le au faitau le moni ma le faamaoni o lenei mau, ma se vaaiga ua molimau e le au matutua ma e o matauina ma le toto'a nei suiga, aemaise o le itu o ave i ai le faa tāua a fanau i nei aso, pe a fua i mea o faananau i ai le mana'o e faamālie i aso uma, faatusa i lo latou olaga tapua'i ma le mata'u i le Atua. Ou te talitonu, e le mafai ona tatou toe ki i tua le uati, pe tatou te nonofo pea i le mea tasi, a o faasolo le lalolagi i luma ma ona suiga, pau lava le tali o nei faafitauli, ia mata'alia tatou Matua; ia taofiofi le i'u maea, o mea amiotonu ma mea sili aupito lelei ua tatou iloa, e pui-puia ai a tatou fanau mai nei aafiaga.

E pei ona faailo atu muamua, e le mafai na tatou lafoa'i nei suiga a o i ai o latou sao tāua mo le vave o fesoota'iga, ma feau aoga, ae manatua foi, ia tutusa pea lo tatou faatāua ma talia o suiga, faatasi ma lo tatou mata-i- tūina o aafiaga ogaoga e ono lamatia ai nai a tatou fanau. O le mea moni, a lelei ona tatou taulimaina nei suiga e ala i lo tatou iloa lelei o mea o faatino ma aga'i i ai le faaogaina e fanau o nei aso ma fesootaiga, o le a mamao foi ni faafitauli tugā ma ni lape e ono tula'i mai i totonu o tatou Aiga ma siosiomaga uma talafeagai e aga'i i ai a tatou fanau pei o aoga, taaloga, a ia faasilisili ai ona taulamua ona tata'i ma faasino a tatou fanau i le Aoga aso Sa, le Autalavou, aemaise o le lotu.

E leai lava se isi malosi sili atu nai lo le tatou faaauau pea o tatou tiute masani faaMatua, e laveaiina ai a tatou fanau, ia tele so latou taimi e faamaumau i mafutaga faaKerisiano pei ona ta'ua, nai lo tulaga televave faaona po nei pei ona matauina. O le mea aupito sili ona lelei, o le iloa lelei e Matua, o mea o aga'i i ai fanau pei o le Aoga, o le tuua mai o le aoga, o taaloga, o le malu o le afiafi ma tulaga uma faapena. E leitioa le faavae papa na **Fa'auau itulau 8**

fa'ataoto e Matua ma Faifeau i aso ua mavae, o Faigalotu e faatasi uma ai Aiga, Matua ma fanau i afiafi, o iina e iloa tonu ai e matua, le mea o i ai fanau, e taupati ma sii faatasi le faafetai i le Atua, e a'oa'o ia faitau le Tusi Paia, e faasolosolo e Tatalo, laulau le taumafataga a Matua, nonofo i le itu i tua o le fale ma le apa fafano ma le solo, e momoe faatasi i le fale e tasi, e taufagu fo'i i le vaveao e fai le lotu i le taeao a o le i usu i galuega ma aoga. O le olaga moni lea sa faafailele mai ai e matua a latou fanau, pei foi ona ou iloa, sa tatou ui mai ai fo'i, ao lei oo le lalolagi i nei mau suiga. Fai mai nisi o fuaitau faigofie:-

LIMA, LIMALIMA, LIMALIMA FAATASI, - O LIMA NA SAPAI AI LE FANAU, NA FAAFAILELE, O LIMA NA FAFAGA MA TAUSI, AE A FAALETONU LOA O TA FAIVA ALOFILIMA, ONA SUIA LOA LEA FAI MAI UA "VALE TUU LIMA"...

Ua vale faiva o lima. O mataupu tugā ia ma le 'anoa o lo moli talosaga i ai i tatou i aso fai soo, ia aua ne i afea ai o tatou laufanua, o Aiga, le atunuu aemise foi faiva alofilima o le Ekalesia, ma ona tupulaga, aemise lo tatou tofi na foa'i mai e le Atua, o a tatou fanau. Tautuanā, se i 'apo 'apo mai nai a tatou fanau, mai tāfega o suiga tele vave o nei aso.

Tusia : Fetuao S. Mua AKF

"E LELEI MO OE"

O le a se feau a le CORONAVIRUS mo le 'au faatuatua?

Fa'atalofa atu i lenei lua masina o lomiga a le Lamepa, o le nusipepa fa'aleagaga a le Ekalesia o lo'o mafai ona maua ai feso'otaiga fa'aleagaga, e fesoasoani atili ai i a'i tatou, a'o feagai ma tiute ma faiva. Aemaise o le vesia ai o le lalolagi i le fa'ama'i o le Koviti19 (Coronavirus). Tatou te lagona pea le lotu fa'afetai i le Atua, aua e ui lava ina vesia lo outou soifua ma le ola ona o fa'ama'i, ae viia pea le Atua ona o lona alofa, e ala i lana puipuiga i ai tatou. O le tatou tusitusiga foi lea i lenei lua masina.

A'o tatou i ai i lenei vaitau i le pepesi ai o fa'ama'i, e lelei foi ona tatou va'ava'ai atili po'o le a se feau mo oe ma a'u o lo'o mafai ona tatou iloa i le o'o mai o le Koviti19 e mafai ai ona fa'atumauiina ai pea lo tatou ola fa'atuatua i le Atua. A'o i ai se tasi o aiga i le falemai ona o 'aafiaga o le fa'ama'i o le coronavirus, ua toso nei le tagata ma'i o lea aiga i totonu o le ICU. Ua silia ma le vaiaso talu ona taoto i le falemai ona o le Coronavirus, e lei mafai e se tasi o lona aiga ona asiasi atu i ai. Ou te malamalama i le tiga ma le fa'anoanoa ua o'o i ai le aiga. Sa nonofo ma fa'atali ma fa'alologologo i se tala mai foma'i a'o latou nofonofo fa'alologo e ala i le fa'atali mo le vala'au mai a le foma'i. Ou te iloa sa le mamanao lea aiga i se tala fa'anoanoa, ae

na'o se tala fiafia sa latou fia faalogo i ai. O le fa'atumauiina o lagona ma manatu o loo tatou i ai i lenei lalolagi, tatou te lagona fa'atasi ai fa'apuga masani o le olaga e fa'apea, "*e mafai e le Alii so'o se mea e finagalo ai o Ia*". O lo tatou manatu, e mafai ona fa'ataunu'uina e le Atua na'o mea lelei, ma le matagofie e faapupula i ai o tatou mata. Peitai, i totonu o se fa'apuga fa'apenei, e lu'itauina ai i tatou e talia so'o se mea e tali mai ai le Atua i ai tatou, tatou te mafai ai ona manino i totonu o mafatiaga e pei ona fai mai le Salamo 135: 6 i le faamoemoe ma le filemu i le pogisa i totonu o le lalolagi o le coronavirus.

Ae tatou te lei talanoa i le coronavirus ma lana feau mo i tatou, sei o tatou tilotilo muamua lava i le Salamo 135:6. O lenei Salamo e le o iloa poo ai na tusia. Peitai e toatele ia sikola o le Feagaiga Tuai, o loo manatu o lenei Salamo, na tusia e fa'afou ai le fa'atuatua ma le lotu fa'afetai o le tagata i le Atua. O le Atua e sili i Atua uma. Po'o le a lava le mea e finagalo ai le Alii, na te faia lava. Fai mai le tusitala, o lo'o pule le Atua i le lagi, o le lalolagi, o le 'ea, o le matagi, o tupu uma, tagata ma manu. O tagata uma ma mea uma ua i ona 'a'ao, ma e tataua ona tatou fa'amanuina le Alii.

I le Salamo e 135: 6 e tutusa lelei ma le vaai agai i le Salamo 115: 3, lea o lo'o ta'ua ai e le tusitala, "*O lo tatou Atua o i le lagi, Na te faia mea uma na ia mana'o ai.*" O nei salamo e lua na tusia faatatau i le malo o Isaraelu, e fa'amanatu ia te i latou na'o le Atua lo latou fa'atuatua ma tapua'i ai. E manatu le tusitala, o lenei Salamo, e na'o le Atua e pule ma alofa, ma e finagalo o Ia e ao i le tagata ona ola fa'atuatua. A tatou tilotilo i nei Salamo e lua, ona atagia mai lea o le o'o mai o le coronavirus o lo'o silafia e le Atua.

Peitai, e tataua foi ona tatou faia ni fesili e mafai ai ona tatou manino lelei i le uiga o nei Salamo. O le fesili la, Po'o silafia e le Atua le i ai o le coronavirus i le lalolagi? I lo tatou talitonuga fa'amaoni e ala i le taitaiga a le Atua, ua tatou mautinoa ai o lo'o silafia lelei e le Atua lenei fa'ama'i ma lona i ai i le lalolagi. O le Atua e pule aoao, malosi ma le poto uma, e auai i lana foafoaga. Tatou te mautinoa e leai se mea e tupu i fafo atu o le pule a le Atua (Isaia 46: 8-11), ma e fiafia foi o ia i mea uma na ia faia (Salamo 135: 6). E leai se mea e faigata i le Atua (Ier 32:27). E leai se mea na tupu i le lalolagi e le silafia e le Atua. Na ia faia le tagata ma e iai lana pule atoa i luga o le tagata.

Peitai tatou te mafaufau ma le totoā, ma tatou fesili, o ai na faia o tatou fofoga (gutu)? O ai na faia ia gūgū, pe logonoa, pe vaai, pe tauaso? E le o a'u, o le Alii? "(Esoto 4:11). Na te avatua le ola, ma Na te aumaia le oti; Na te taia ma Na te fa'amaloloina (Teu.32:39). E leai se mea e le mafai e ia ona taofia (Isaia 46:10, Iopu 42: 2). Na'o ia lava o le Atua i mea uma na faia (Salamo 103: 19). E faaogaina e le Atua puapuaga ma faigata, e aumai ai le tagata i le fa'atuatua. Peitai o se vaai loloto i totonu o le i ai o le lalolagi i lenei fa'ama'i, ua aumaia ai mo'i tatou se feau

taua ma se fa'amanatu mo'i tatou. O leni fa'amanatu, o le mafai lea ona tumau i le fa'atuatua i le Atua. Ia tatou lagona uma le taua o le mafuta mai o le Atua, aua o ia o le Atua na te silafia mea uma. I totonugalemu o mafatiaga ma le soona vevesi o mafaufau ona o leni faamai, tatou te talitonu ai ma le fa'atuatua, e leai se mea e fa'anefu i le silafaga a le Atua. O le feau taua lea o loo aumai e le coronavirus, o le fa'ataua o mafutaga ma aiga ma fanau, se'i toe tilofia po'o fea itu e ao ona toe fa'alelei atili o ia mafutaga. O fea ua magoto i ai le igafu i le mafutaga, ae toe afua se isi la'asaga fou. O le faitatalo fa'atasi, sei anapogi ma tatou tūtūfa'atasi o tagata fa'atuatua e moli talosaga i le Atua e ala i le anapogi. O le nofo i aiga ma sei toe mafaufau te isi i le ola fefa'asoaa'i, le ola fetufaa'i, ma le ola galulue fa'atasi.

Ia tatou manatua, ia tumau lo tatou ola fa'atuatua i le Atua. Mo le o'o mai o le coronavirus, tatou te iloa ai le Atua o lo'o lotolotoi i totonu o leni fa'ama'i, e ala i lona alofa, ma lana fa'aolataga mo 'oe ma a'u. Taimi taua ia mo i tatou, tatou te iloa ai ona fa'amaulalo i le Atua. Aua nei alu maumu leni taimi, ae ia avea o se taimi taua tatou te pipi'i ai i le Atua. Tatou tatalo fa'atasi ma aiga o i latou ua mafatia. Siaki ou tuaoi po'o fia maua se fesoasoani, pe ofoina se fesoasoani mo i latou o mo'omia lau fesoasoani. Ia tatou manatua le au uso e, e le fa'afeifeina i tatou e le Atua i le coronavirus, pe avea ma ala o le lotoita ai. A ia avea lona alofa ma lana fa'aolataga e mamanuina lou loto, e mafai ai ona tatou iloa atili ai le silisiliese o le Atua i lo tatou ola.

O le Fa'aolataga tele na saunia e Keriso mo oe ma au, e le o se mea tatou te ofo ai, pe tatou te solomuli ma palaai ai, ona ua o'o mai le oti. Ao Iesu Keriso na tu i luma o le fa'amasinoga, na fasiotia o ia ona o i tatou. O le Atua e pule i le ola ma le oti. O lana taulaga e ala i lona soifua ofoina mai, ua avea ai i tatou ma fanau fa'atuatua, ma ua fa'amagaloina ai a tatou agasala, ina ua ia fa'asaoloto i tatou mai le tui o le oti. I le totonugalemu o le coronavirus, tatou te iloa ai le taua o le satauro o le fa'aolataga, na maliu fua ai lo tatou Alii. Ia manatua le auso e, e pule aoao lava le Atua, AUA E LELEI MO OE.

Saunia: Iese Faavaoga AKF

Fa'aauu pea

O 'e manatua se mea lelei na faia e Iesu mo oe?

A o taoto le alii o Iosefa i luga o lona moega ua mai tigaina lava, e ui ina tigaina o ia, peitai sa ia iloa lelei lona pulatoa i fafo aga'i i le lagi, ma memumemu nai upu i lona gutu. Sa ia iloa le matagofie o le lagi, ma ona foliga o loo tilotilo mai ia te ia. Sa faateia si alii o Iosefa i le faapea atu o le tamaitai foma'i, Iosefa sei faainu au fualaau. Na nofo i

luga Iosefa, ma inu ana fualaau. Sa fesili le tamaitai foma'i, o a ia upu sa e memumemu ai Iosefa? Sa pulatoa Iosefa i le tamaitai foma'i, ua faapea atu si ana tali, sa ou tau mafaufau ma ou va'ai i le lagi, po'o ou manatu se mea lelei na faia e Iesu mo a'u. Ua tu le tamaitai foma'i, ma faapea si ana tala, o e manatua la se mea lelei na faia e Iesu mo oe? Na liliu Iosefa i le tama'ita'i foma'i ma tali atu, Ioe o le mea lelei ua faia e Iesu mo a'u, o lou sau tonu lava ma a'u fualaau i le taimi ua ou lagona ai lo'u tigaina. Na tu le teine ua le magagana, ma liliu ma alu loa. E anoanoa'i mea lelei e tele ua faia e Iesu mo 'oe ma a'u. E le faitauina, auā o lona alofa, e tupu pea i lea aso ma lea aso, i taimi uma. Peitai, a tatou mafaufau i le agalelei tausai mai o le Atua, ona tatou manatua lea, o lona alofa e le liliu e faavavau. Aua o lona alofa e lautele, e le opoina, o lona alofa e maualuga e le 'aeina, o lona alofa e loloto e le mauuina. O le alofa lena o le Atua, e te manatua ai mea lelei e tele ua Ia faia mo i tatou. E faaalua lona alofa i le taimi ua tatou manaomia ai o ia, ma taimi ua tatou lagona ai ua tatou le mafaia se mea. A o oe, "O 'e manatua se mea lelei na faia e Iesu mo oe?"

KORONA19 MA LE A'AFIAGA O LE EKALLESIA

Fa'atu le loma mai le Malo

Ua fa'ailoa mai e le Malo auala e fa'aitiitia ai le fa'asala-lauina o le Korona19. E mafai fa'apefea ona tatou tali atu o se ekalesia? E mafai fa'apefea ona tatou fesoasoani i tagata ia ola malōlōina, ma fa'apefea ona avea i tatou ma molimau mo Iesu i leni taimi? E tele auala ua fa'aalia e le malō, e tatau ai ona fo'ia le pipisi atu o le Korona19. E pei la o nisi nei o vaega:

1. E mo'omia e tagata uma ona nonofo i o latou fale, vagana ai o ni feau tāua, e ao ai ona tu'ua le fale.
2. Ia puipuia tagata uma mai le fa'aaogaina o fale le taua.
3. Taofia fa'atasiga ma le sili atu ma le toasefulu tagata.

O le nofo i le fale ma faigaluega mai ai. Fai mai le fale meaā'oga a le fanau. Tu'ua le fale pe 'afai o se fa'atau, vaai le foma'i, ma fai se fa'amalosi tino fa'atasi ai ma nisi o lou aiga. Ua le gata i lea, a ua fa'aitiitia le feso'otai atu i tagata o lou aiga. Afai e te malaga e te fa'atau, ia tausia le va o le lua mita po'o le ono futu ma le isi tagata. O nei faiga, ua le gata ina tatou maitauina i nisi o atunuu tetele ua aafia o latou tagata i le korona19, ae ua fa'apeaina foi i totonu o Amerika Samoa nei. I totonu o le li'o o le Ekalesia, ua tatou maitauina ai le si'i mai o tapuaiga mai totonu o falesa, ma tu'u i luga o upega tafa'ilagi. O se itu lelei lea mo le galuega folafola ma le galuega tala'i a le au fa'atuatua. Peitai, ua tatou 'au'au fa'atasi e faia nei fa'atinoga fou, ona o le lagoonu lava i le fa'aitiitia o le pepesi,

Fa'aauu itulau 10

ma ia aua nei 'a'afia nisi i lenei fa'ama'i matautia.

O le a se silasila a le Ekalesia i nei a'afiaga?

Peitai, o le a se vaai aga'i i le lotoifale o le tatou Ekalesia EFKAS i lenei fa'amai? Ua le o toe po se lilo, ua tu'ua lava sauniga lotu, ona o le lagolagoina o fautuaga mo le faaitiitia o le o'o mai o le Korona19. Ua le mafai ona toe maua faiga ma aga masani a le tagata tapua'i, sa masani ai i lea Aso Sa, ma lea Aso Sa. Ua misia avanoa sa feiloai ai ma feofoofota'i, ma talatalanoa fiafia.

I totonu o le lotoifale o aulotu taitasi, ua tulai mai ai le tele o a'afiaga ua tulai mai. O nei 'aafiaga, ua le mafai ai ona fa'ataunuu sauniga masani ai le 'au Kerisiano, e pei o le Aso Malu ma le Toe Tu. O sauniga taua ia i le tagata tapuai, ma le tagata fa'atuatua. Aua o le fatu lea o lana tapuaiga. E le gata i lea, ae o nisi o sauniga faitauina a le Ekalesia. Ua o'o lava foi i aoga a le fanau, ua le gata ua leai ma vaioa a'oga, ae ua le mafai ona maua le avanoa e fa'alogo ai le tamaititi o le Aoga Aso Sa i mataupu a'oa'oina mai lea Aso Sa i lea Aso Sa.

A'afiaga o aulotu i le Korona19'

E tautala lava ma le ava ma le migao e tatau ai, auā e le masalomia o lo'o tupu lenei tulaga. O se tasi o a'afiaga o le Ekalesia i totonu o le Korona19, ua palasi maualalo lona fa'aoloaina. Ua tele itutino o galuega fai, mai totonu o aulotu ma le Ekalesia, ua le toe ausia le tulaga sa i ai. Ua palasi ane te isi le fa'aoloaina o atinae taitasi mai aulotu ese'ese, ma ua a'afia ai le tino o le Ekalesia Aoao. O aga ia ma masani a le tagata tautua, le tagata auauna, e sasa'a ona faiva mo le Atua ma lona finagalo e ala i le aulotu, ma o'o atu ai i le Ekalesia Aoao. Peitai, o nei taimi, ua avea le leai o ni lotu e toe faia i le Aso Sa, ma auala ua mafai ai ona fa'aitiitia nei vaega uma. O nisi aulotu o lo'o fuafua galuega tauatia'e, ma galuega toe fa'aleleia i le itu i fafo. Ua le mafai ona fa'aauauna ona o le fa'ama'i. O nisi aulotu ua le toe manatu mamafa i faiga taulaga, ma ua mapuna a'e ai le fa'aupuga foi lea...O le taulaga a e maua, ua lava lena. O lagona fesui ai ia, ina ua vaioa le toe faia o sauniga lotu. O le masani a le tagata kerisiano, e alu i le lotu ma fa'apolopolo lana taulaga. O a mea fai a le lotu, o taulaga uma mea ia, ma e le mafai ona misi i le tagata fa'atuatua, ia faiga, ua masani ai le soifua ma le ola.

'Aafiaga o le Ekalesia Aoao'

Ua le o toe po se lilo, ua le o'o se fonotaga i lenei tautua. E oo lava i fonotaga komiti, ua taumate pe o'o pe leai. Ua o'o lava i sauniga masani i totonu o fonotaga, ua le faataunuuina. Peitai o le tasi lenei o anava masani a le Ekalesia Aoao, e le mafai ona misia. Po'o a lava faigata, o afa e tutupu mai, e fa'ataunu'uina lava lana fonotaga. Peitai, i lenei fa'ama'i Kolona19, ua toloia fa'amoemoega o le Ekalesia Aoao. Ma, ua le fuatasi i le tatou nei Ekalesia, ae ua fa'apeaina ai Ekalesia uma. O le fonotaga, o le fu'a e tula'i uma i ai lagona ma manatu o le Ekalesia, o Toeaiina,

Fa'afeagaiga ma aulotu, o usufono, ma tagata uma. Aua o avanoa ia e lauliliuina ai le lumanai o le Ekalesia. O avanoa e faufau ai le Sa o le Ekalesia Aoao, mo le agai i le lumanai. E to ese ni mea fa'aletonu, ae fa'aopoopo ni mea lelei. Afai e mama i taloa, ia apo i aoa, aua le Ekalesia Aoao. E tulituli matāgau lagona o le 'au faigaluega, aua le manuia o le galuega. E le taumateina foi, o le a tele se afaina o le a i ai lana tala fa'atau o le tupe fa'aletausaga, e atiana'e ai ona magavai taitasi, aua ana auunaga.

Fa'amalosi au fa'ale-Tala Lelei.

Ina ua uma ona fa'amalolō e Iesu o tagata mama'i na avatu ia te ia, Ona ia fetalai atu lea i ona soo,... Ina tatou o atu ia i le tasi itu.(Mareko 4:35-41). O le tala lea, na vavao ai e Iesu le matagi. Peitai, e tele ni itu ta'ua o lo'o mafai ona aumai e lenei tala mo le au faitau. E lua ni vaega taua, e fia fa'amamafaina mo se fa'amalosi fa'ale-Tala Lelei, ao tatou i ai i a'afiaga o le Korona19.

1. Ina tatou o atu ia i le tasi ituva'i. Ua uma ona faia e Iesu vavega tetele, fa'amalolo tagata mamai. Ua mautinoa foi e Iesu, o le a fetuleni mai nei le motu o tagata, e aumai le viiga ia te ia, ma lana galuega. Ona fetalai lea o Iesu, e o i le isi ituva'i. O le finagalo o Iesu, e le manao i se viiga, e le finagalo Iesu ia viia o ia ona o lana galuega. Ae ia viia le Atua o le ona le mana uma lava, na afua ai ona faia nei vavega.

2. Ona vavao lea e Iesu o le matagi. Saunoa lea o Iesu...Se a le mea tou te fefefe ai fa'apena? Se a le mea tou te le fa'atuatua mai ai? O uiga masani o le tagata, e matafefe pe a fetatia'i ma faigata. E ma'alili pe a fesouaina le olaga i puapuaiga. E le mautonu, aua e tupu loa faigata, saili solo loa i se fesoasoani. Ao lea ua saunoa manino Iesu. Aisea tou te fefefe ai. Se a le mea ua tou le fa'atuatua mai ai. Ao feagai aulotu ma le Ekalesia aoao i fa'afitauli ona o lenei faamai aoao ma lenei fa'amai. Peitai, tatou o i le isi ituva'i, sei o tatou va'ava'ai ai i mea sili e faia e le Atua moi tatou. O lea ua e feagai ma fa'afitauli ona o le Korona19. Ua manua lou lotoifale fa'ale aulotu, solovi le tele o le fa'aoloaina o fa'atinoga a aulotu, e fa'apea foi i le Ekalesia aoao. Ae aoga lo tatou o i le isi itu o le vai, sei o tatou va'ava'ai ai i le mea sili e faia e Iesu moi tatou. Tatou o i le isi ituva'i e saili ai le malosi fou, ma fa'atalitali ai i le Atua fai mea sili. Le Atua o lea na fetalai mai, Se a ua tatou le fa'atuatua ai. O le mea moni ua matagitogaina le tatou folauga. Ae tatou fa'amoe-moe o lo'o tatou malaga fa'atasi ma Iesu, tatou te le fefefe ai pe a fesouaina lo tatou vaa lenei faamai Korona19. Ae tatou te lagona ai le loto fa'atuatua, aua o loo i ai faatasi o Ia ma I tatou. O loo tatou folau faatasi ma ia i totonu o le fesouaina o le Korona 19. E taua lo tatou o i le isi itu, tatou te iloa ai vavega e faia e Iesu mo lo tatou ola.

Ia manatua aulotu ma le Ekalesia aoao...E le mafai e se mea o lenei lalolagi, po'o fa'amai, po'o matagi, e o'o a i mea atali. Ona fa'ateaeeseina i tatou mai le Alofa o le Atua.

Saunia : Iese Faavaoga AKF

E LEAI SE MEA E FOU I LALO O LE LA

Failauga 1:2 : “Ua fapea mai le Failauga, e matuā faatauvaa, e matuā faatauvaa; e matuā faatauvaa mea uma lava.”

O le soifuaga o lo o e soifua ma ou ola ai, ua pei o se ataata e taoto mai i o tatou luma, ona mou atu lea i le matagi. E le o se mea e tumau. E faapena lou soifua ma lo'u ola, ua faata'oto le taimi ma lona itula, ae o le faaogaina a o le mea taua lea. O le ala faapea lea o le tala a le Failauga, “ e matuā faatauvaa, e matuā faatauvaa; e matuā faatauvaa mea uma lava.” E le tumau se mea e o'o i le faavavau. Ua silafia foi e le Failauga, e tupu ma toe tupu foi mea i lea tupulaga ma lea tupulaga, faata'ita'iga, e tupu taua ma faama'i, o mala faale-natura, e fananau foi ma feoti tagata, e sui foi faiga ma aganuu, ae le suia ai le natura o mea na foafoa e le Atua. E a'oa'oina tagata, ae le suia ai le natura o le tagata. E a'afia le tagata i lona siosiomaga ma lona a'oa'oina, ae maise tu ma agaifanua, ae le fou lava ia mea. E felanulanua'i suiga ma faiga faaonapo nei, ae le fou, ua na o le televave faatusatusa i le tuana'i.

O lea ua tatou feagai ma le faama'i e foliga mai e fou, ae le fou. O le vairusi po o le koviti-19, ua faaigoa ai nei e le au popoto o le lalolagi, e le fou. Ioe, o le faama'i oti, 'ae o le faama'i oti o lo'o faamaumau i tala faasolopito o le lalolagi na tupu i le atu Europa i le tausaga 1580. E iva afe tagata feoti i Europa lava ia. E tele nisi faama'i oti i le 17 ma le 18 seneturi, 'ae o le tausaga e 1918, o loo i ai le talitonuga i faamaumauga o tala faasolopito o le lalolagi, pe a ma le 50 pe 100 miliona tagata maliliu i lea tausaga (1918) i le laolagi atoa. Pe a ma le 560,000 pe sili atu foi tagata Amerika lava ia na maliliu ai. E le mai loa poo fea na amata ai le faamai oti, ae o lo'o iai masalosalo o le au popoto, na amata i Amerika ma faasolo ai i Europa ona o le taua muamua o le lalolagi. O le afaina o Europa na pesia ai Ausetalia ma Niusila ma afaina atu ai ma Samoa i Sisifo i le tausaga (1918). O lo'o faamaumaui, pe a ma le 8000 tagata maliliu pe sili atu foi. Na lipotia le pepesi o le faama'i, ae le amanaia ma faataliga tuli le malō tele i lea vaiata. E leai se fesoota'iga i le va o falema'i faaitumalo (public health) ma le soifua malōlōina tutotonu poo le Feterale (Centers for Disease Control). O le manatu māmā o le malō o Amerika ma isi malō o le lalolagi, ae maise taua na punafanau ai le faama'i oti. Ua pepesi pei o se afi o se vao matua ua salalau ona o le malosi o le matagi. Ua pesia ai le lalolagi atoa.

I le tusi a Kenese 41:28-30, o lo'o aumai ai e Iosefa lapa-taiga ma fautuaga ia Farao i mea o le a tutupu i lona malō. Faafetai na faalogo ma amanaia e Farao. Na manuia lona taunuuga. E le'i faapenaina Amerika ma Europa i le 1918, latou te le'i amanaiaina, ma ua avefa ma auala ua salalau ai le faama'i oti i Amerika ma Europa ma pisia ai le lalolagi atoa ona o le faatamala. Ali a'e le Koviti 19 i Saina, faailoa i

Amerika ma isi atunuu o le lalolagi ia Tesema 2019, ae maise malō au faatasi, ae faatalalē lava ma lē manatu mamafa iai, lea ua le mafai ona fo'ia. O le po'u ua avefa ma papala, tulou ona ua tuai ona fōfō le faafitauli. Sa tupu i le 1918 ae o lo'o tupu pea. Tele e ua maliliu, tele e o lo'o tigaina, ae o le toatele o i latou o lo'o galulue so'oso'o tau'au aua le puipuiga o tagata lautele, ona o lo tatou faa-tamala lava ma le leaga o le fesootaiga. O le lesona tele lea, o le misela o le 2019 i Samoa. Leaga le fesootaiga o falema'i faaitumalō ma le falema'i tutotonu a le malō o Samoa i le faia lea o tui puipuia e le gata o fanau iti, a o le aotelega o tagata. E taua le siosiomaga faa-falema'i faa-italumalō, e ao ona iai mea uma e mana'omia, e pei o le falema'i tutotonu i Fagaalu. Ia lava mea faigaluega, o vaialau, tapena le 'au faigaluega ia lava taoso, e talia le manaoga o le atunuu. Mātua e, e leai foi se mea e mafaia e le malō ma le mata-galuega a le falema'i, pe a le lagolago matua. Aua nei o tatou faatalitali ma i'u ai ina tuai, ae tula'i ma saili. O le lesona tele lenā o lenei faama'i oti. Tapena mamao, fetāla'i lau ato ponapona mātua, ae aua le nofoloa.

E le galo ai le ofo a le malo o Amerika e ala atu i le Fua po'o le Navy a Tutuila, ae tete'e e le ta'ita'i 'au o le malō o Niusila, le tamaloa o Ropati Lokeni. Ita faamoemoe Niusila i le tete'e o Samoa i lana pulega, ae tuufau ai tagata Samoa e feoti, ae sa ofoina tui puipuia mai Tutuila. E fete'ena'i malō ma fetogia'i tu'ua'iga, ae galo ai le oia o le lautele.

Faafetai i Tamā o le Ekalesia i le tofā ua a'e, i le anapogi ua feagai ai ma lau Ekalesia Aoa, ua fai ma to'omaga i le tapunia ai o Maota Tapua'i i Aso Sa, ae tatou faamamalu le poloaiga ua tasi iai le faigā malō. Le Ekalesia e ma le atunuu, soia ia tatou te tusitusi lima ma tu'ua'i solo le sesē, ae sagai ane ai o le tai ma saili le vai fofō. Tatou u'u lima, tutu faatasi ma saili faatasi.

Ao faaifoifo lenei tusitusiga, ua ou mautinoa ai upu o le Failauga. “E matua faatauvaa mea uma.” Ua na o se puao e taoto mai i o tatou luma, ona mou lea. O le fugalau e matagofie, ae iai le taimi e magumagu ai. A o 'e soifua ma ou ola i lenei olaga, o iai ea so ta sao e taumafai e faalelei pe faalegaina ai le siosiomaga, a o le foafoaga a le Atua, ua alai ona maua i le tele o faama'i? E taua lou sao ma lau galuega fai mo le lumana'i. E tutupu faama'i ma mala faale-natura, e le ona o so tatou poto po'o se malosia o se tagata, ae o le faaaliga o le mana o le Atua. Tatou te tu'ua'i la le Atua i lenei fa'ama'i oti, ae tatou te le faafetai i le Atua i tofotofoga e tapena ai i tatou e mata'ala ma galulue i ologa ma'a ma tatou taleni e saili ai auala e puipuia ai o tatou tagata. E tapisa le lalolagi ma faitio, ae o le tagata o le Atua e fai pea lona tiute ma savali pea i luma, e mafatia ae taunuu i manuia o le Atua. O le faamoemoe ola lava ia o lo'o taoto i le maliu ma le toetu o Iesu Keriso, ua ia manumalo a'ia'i i ona puapuaga, o le tatou manumalo faatasi foi lea i lenei faama'i oti, Amene.

Saunia : Usugafono Satele FFS.

GALUEGA O LE ALOFA

FT: II Tupu 2:9-14 : FF: ITesalonia 1:2-7

AUTU : VA'AI I TUA, VA'AI I LUMA

Matua: 1Tesalonia 1:2-3 *“Matou te faafetai pea lava i le Atua, ona o outou uma lava, o lo’o ta’uta’ua outou i a matou tatalo, e le aunoa ona matou manatua i luma o le Atua o lo tatou Tama lea, la outou galuega i le faatuatua, ma le faamalosi i le alofa, ma le tumau pea i le faamoemoe i lo tatou Alii o Iesu Keriso.”*

‘A tatou tutū nei ma toe va’ava’ai i tua i le lua vaiaso ua tuana’i. I le galuega o le Alofa na faatinoina mo oe ma a’u i le Satauro. O le aso maliu, e ta’u o le “Aso Faraile Lelei”, ae na pogisa uma ai le laolagi. A fa’asolo pea la tatou va’ai i tua, i aso e tolu na soso’o ane ai, fai mai na liua ai le pogisa lena i le Malamalama o le Toetu---- le Malamalama o le Ola! Sa lē mafai e le tuugamau ona taofi i totonu, auā o le La a le Atua e oso pea. O le La sa oso i Ierusalemā, ae suluiā ai Mataniu- Feagai-ma –le –Ata, Faleū ma Utuagiagi, Malaēola ma Gafoaga! Le Taulaga Mu na alu a’e i le lagi lona nanamu, ae aofia uma ai Samoa i lona sasala matagofie. ‘A tatou tutū la ma toe va’ava’ai i tua i le 2,000 ma ona tupu tausaga ua mavae, ona tatou toe va’ava’ai lea i luma i le manuia ua tatou sapi ai nei, ona o le “Galuega o le Alofa” lea na faia i Kalevaria; e tasi le lagona e o’o mai, o le fia vivi’i ma faafetai. Lea na fa’apea ane ai le fatu-pese: “Ua ou vivi’i ma faafetai, Iesu i lou alofa mai! O lou alofa ua naunau; o lou alofa e tumau! O lou maliu puapuaga, mo a’u ia sao ai i luga. E vi’ia ai e faavavau, O lou alofa e tumau!”

Atonu e faapea le lagona na o’o i le aposetolo o Paulo ona o le ekalesia i Tesalonia. Lagona fa’agaētia ona o fua lelei o lana galuega fitā sa fai. O upu amata o lana tusi, fai mai: “Matou te fa’afetai pea lava i le Atua” ona o outou uma lava. Matou lea e ta’ua e Paulo, o Paulo, o Sila ma Timoteo. E faafetaia le au uso i Tesalonia. O a mea ia e faafetaia ai e le aposetolo Tesalonia? O mea uma lava. Va’ai i tua, toe va’ai i luma; ua paepae fanua i faamanuiaga a le Atua e mafua ai le agaga faafetai mo Tesalonia. A to manatu le aposetolo i le tulaga na amata mai ai le Ekalesia i Tesalonia, e le uma le agaga faafetai. O se ekalesia itiiti na fausia i tagata o nu’u ese, fa’apaupau ma le ifo i tupua. Ae ina ua liliu mai i le Talalelei ia Iesu Keriso, na aveā ma fa’aa’oa’o o le ola fou lea. E faafetaia ona o le auauna lagolago o Tesalonia i le tala’iga. Na latou talia loa le Upu, savavali ai loa ma fa’atino. E ui ina sa iai ni to’atugā, ma ni faigata ōgaoga sa fa’amalumalu ia Tesalonia, ae na maua pea le onosa’i e tutumau ai Tesalonia ona o le faatasi ane o le Agaga Paia. Le Agaga Paia lea na fa’aali ia Paulo e alu i Tesalonia. O le ekalesia na faasino mai e le Atua. Manatua, o le fa’aaliga na iloa e Paulo i le miti, na maua ai le fa’afanua o lana malaga tala’i. O le tagata na tu ma faapea mai, “Sau ia i Maketonia

nei, ma feosasoani mai ia te i matou” O Tesalonia, o le a’ai muamua lea o Maketonia. Na fai lava le galuega a Paulo ma le fa’atuatua ma le fa’amalosi ane o le Agaga Paia ia te ia. E le’i nofo pea Paulo i Tesalonia; ae na fa’auau lana galuega tala’i i isi nu’u. Po’o fea lava na alu i ai, na a’ave atu tala i le tutumau o le au-uso Tesalonia i le Alii, ae maise lo latou alualu i le Talalelei.

Sa va’ava’ai ma maitau lelei e tagata Tesalonia uiga o Paulo a’o latou faatasi, ma fa’aa’oa’o i ai. Na iloa e Tesalonia le manuia o le tala’aiga a Paulo, ona o le malosi ese na iā te ia. Le malosi o le Agaga lea na ta’utino e le aposetolo, fai mai vs.5 “E le’i o’o atu la matou tala lelei ia te outou na o le upu, a o le mana, ma le Agaga Paia, atoa ma le mautinoa i le Alii”..... Le mana lena o le Agaga na liua ai i latou e aveā ma tagata fou. Na va’aia i o latou olaga uiga faavae o tagata ua fa’atalaleleiina, ma ua soifua ai Keriso. O le Faatuatua galue, o le Alofa fa’atino, ma le Faamoemoe ola. Fai mai Paulo, “E lē aunoa ona matou manatua la outou galuega i le fa’atuatua, ma le faamalosi i le alofa, ma le tumau pea i le fa’amoemoe i lo tatou Alii o Iesu Keriso... Ioe, e lē na ona talia le talalelei i le fa’atuatua, ona nofonofa lea ma fa’atalitali se’i o’o i le Aso Sa e alu ai i le lotu, e iloa ai o oe o le tagata faatuatua. A e fai mai sa galuea’ina lo latou faatuatua. E lē na ona alolofa foi i le upu ma le ta’u, ae na “faatino le alofa” ma fa’aa’oa’o atu i isi le uiga o le fa’atuatua ola, lea na latou va’ai ai ia Paulo. O uiga na sa latou fa’ata’ita’ia. Na a’ave tala o uiga ia o le Ekalesia i Tesalonia, o tagata ua soifua ai Keriso. Fai mai Paulo vs8]“E le aoga i ai sa matou upu e fai atu”, aua o lea ua outou matamata i ai. Aua fo’i ua molimau galuega. E leo tele galuega i lo upu. Sa tulimata’i le va’ai a Kerisiano o Tesalonia i le lumana’i—sa VA’AI I LUMA i le faataunu’uga o le faamoemoe, o le Ola e faavavau. O le mafuaaga aupito sili lea o le agaga faafetai o le aposetolo. Ua fa’amauiā le tala i le galuega a le Perofeta o Elisaia i le tusi e lua i Tupu. E pei o le filifiliga o Tesalonia i Maketonia: na faapea foi le filifiliga o Elisaia.

Na filifili mai le lagi. O tofiga mai le Atua. Na fetalai le Atua ia Elia, e alu e fa’au’u Elisaia le atalii o Safata e fai mona sui. A’o suotosinaina le fanua o lona tamā. Na tu’ua loa e Elisaia mea uma, ae mulimuli atu ia Elia, ma la faatasi se’ia o’o ina aveolaina Elia. Ina ua o’o i le aso e aveina a’e ai Elia i le lagi, na ia taumafai ia valavala ma Elisaia. E ui ina fai fa’afia Elia ia Elisaia e fa’atali atu, ae sa lē mafai e Elisaia ona tu’ua o lona matai. Ina ua fesili Elia ia Elisaia i se mea e mana’o ai, ae la te le’I tete’a, e lē taumate na tu Elisaia ma to manatu I vavega tetele na faia e Elia, ae maise o lona faatuatua i le Atua. Atonu na manatu i le tali a le Atua i le tatalo a Elia mo se timu, ae maise le afi na alu ifo mai le lagi, ma mu ai le taulaga i luma o perofeta a Pa’ala. Atonu na manatu i le lavea’iina o Elia e le Atua nai lima o A’apo ma Iesepela. Na iloa lelei e Elisaia, e le’i faasaoina Elia mai faigata ia, i sona lava malosi. Na laveaiina e le

Atua Soifua. Na iloa e Elisaia, e le'i faia fua e Elia vavega tetele, na mafai ona o le faauuga Mana a le Atua na i ona luga. Ina ua fesili atu Elia, e le'i fa'alua fesasi le tali a Elisaia. Na ia fai atu ma le mautinoa: "Fa'alua mai lou agaga ia te a'u" – Ua tu nei Elisaia ma va'ai i le lumana'i-- - le galuega o le 'a tu'uina mai ia te ia, -- O le'a faapefea nei ona fai? O le'a faapefea ona fa'aauuina le galuega pe'a fai e ave'eseina lona matai mai ia te ia? - O lea na ia fesili ai mo le mea e tasi e taa'u i le taimi lea, -- Le Agaga o le Atua na ia Elia. Ia le na'o na aumai, a ia fa'alua mai. E le'i vale le tali. Fai mai Elia, "O le mea faigata ua e fai mai ai. Ae afai e te iloa mai pe a aveeseina a'u ia te oe, ona faapea lea ia te oe..."

Ina ua aveina a'e Elia, na pa'u ifo lona ofu tele ia Elisaia. Ona liliu loa lea o Elisaia ma toe fo'i i le Ioritana. Ua tago i le ofu tele ma taa'u a'i le vai o le Ioritana, ona vaelua lea, ae savali ai Elisaia. Na va'ai ane i ai so'o o le au perofeta i Ieriko ma faapea ane: "Ua ia Elisaia le agaga o Elia" E aoga le tu ma va'ai i tua, e toe fa'amanatu mai mea aoga e tapu'e ai ma ta'ita'iina ai le savaliga i le lumana'i. E fai ai ma fa'aa'oa'o i ni e o lo'o va'ava'ai mai i lou Kerisiano, pe ete savali i le Upu lea e te a'oa'o atu. E aoga le fai ma faamanatu mea tetele ma le aoga o le tuana'i, e faamalosi atili ai le aga'i i luma. Auā o le Atua o ananafi na ia Paulo, o le Atua fo'i lena o a-taeo na fa'amanuia ia Tesalonia. O le Atua mamana o le tuana'i na mafai ai e Elia vavega tetele, o le Atua lava fo'i lena na fai ai e Elisaia vavega e sili atu le tele nai lo Elia. O le Atua fo'i lena e aumaia ia te oe, pe a e ole i ai ma le fa'atuatua. Auā e le liliu le Atua, o ananafi, ma le aso, e o'o lava i le fa'avavau. Ioe, e aoga le tu ma va'ai i tua, e ao mai ai ni mea taa'u mo le lumana'i. Mea aoga e pei o le faatuatua e galulue ai pea ma le faamalosi, e faatino ai le alofa i le Atua e ala i e tatou te galulue i ai; ma fa'aolaola ai pea le faamoemoe i mea silisili o i luma. – Ae afai o ni mea e le aoga! Se ā e ma'umau ai lo tatou taimi?—Fai mai Paulo ia Filipi, "tia'i mea na!. Momo'e punoua'i i mea o lumana'i." VA'AI I LUMA. Fa'aoga le Upu a le Atua ma ana Afioga na maua i le tuana'i, e fai ai oe ma se e faaso'a atu le talalelei i nisi e le iloa le Alii. Fa'aoga upu na faalogo ma va'ai ai i le galuega mana a le Agaga Paia, e fa'amalosi ai lou faatuatua i le Atua na te fa'amanaina lou taumafai. Afai na talia e le Atua le mana'o o Elisaia na ala atu ia Elia, ailoga i se ā na te le talia ai sou mana'oga e tu'u atu ia te ia i le fa'atuatua? Afai na feliiu'ina ola o tagata fa'apaupau o Tesalonia i le galuega na fai ma le alofa e le aposetolo, e te manatu e le mafai fo'i ona feliiu'ina ola o nisi e te faasinoina i le Alii?---- O le mea e ao ina manatua, a lautele le Talalelei e ala i lou ola auauna, a tutupu ni vavega i ola o tagata o lo'o e galue i ai – O le faafetai ma le vi'iga e ave i le Atua. O Ia e mafua ai le lelei. Pei o Paulo ma Elisaia, ua na'o ni mea faigaluega i tatou a le Atua e ona le Mana. Na tu'ua i mau le Ekalesia i Tesalonia ae malaga ese Paulo,

auā ua maua'a ai le afioga a le Atua. E aveolaina Elia, ae tu'u ma le Mana le galuega ia Elisaia. A ave'eseina fa'afuase'i o ta tagata faigaluega--- Ua mautu lava le faavae o le Upu a le Atua ma ana Afioga e fa'aauai e ni isi le Galuega o le Alofa lea ta te faia i totonu o o tatou aiga, totonu o tatou nu'u, totonu o le atunu'u, ae maise lana Ekalesia. I lenei vaitau o le fa'ama'i ma le le mautinoa, Samoa! taula'i la tatou va'ai i le Keriso Manumalo. O lona suafa e silisili, nai lo'o se fa'ama'i e fa'amalumu mai. O ona fa'alavalava ua tatou malolō ai. Ia tatou va'ava'ai atu ia Iesu, o Lē na te ta'ita'iina ma Lē na te fa'aatoatoaina lo tatou fa'atuatua. Na Ia onosa'ia le Satauro, na faatauvava ia te Ia le mā, ona o le olioli sa tu'u i ona luma, ia maua e oe ma a'u le Ola e Fa'avavau. Ua nofo nei fo'i o Ia i le itu taumatau o le Atua le Tamā. Vivi'i la'ia ma faafetai i le Atua mo Lana Galuega Alofa mo i tatou lana fanau. I le suafa o Iesu, Amene...

Saunia : Rev. Lisi Thompson, FS.
EFKAS Asili & Afao

Iesu aoao mai au i le tatalo

E mafai ona avea le tatalo ma fa'atinoga matagofie, ma e i ai foi taimi e faigata ai. E tofua lava le tagata ma le auala e fa'atino ai lana tatalo. Tatou te fa'atuatua e fa'afogaina e le Atua a tatou tatalo uma. O lo tatou mauaina o se tali mai i a tatou tatalo, e ese'ese auala e mafai ai ona tali mai le Alii. I le talitonuga fa'alefa'atuatua. O nisi taimi e vave ona tali mai le Atua. O nisi taimi e umi se taimi e fa'atali ai lona tali mai. Peitai, i a tatou tatalo e tali mai ai le Atua i taimi uma. Tatou te tatalo i manaoga, ma e tatou te iloa o nisi taimi ua tatou fa] alogoina fa'alogona e ese mai i taimi masani o le olaga.

I le Salamo 66: 20. O loo tautala ai le FaiSalamo, e le liliuese le Atua mai a tatou tatalo. E le mafai foi ona liliu ese lona alofa. E leai se mea e ta'u o se Kerisiano atoatoa. Tatou te tautevateva uma, ma o nisi foi taimi e tatou te solomuli, ae o le tatalaina o tatou loto ma fa'aalia a tatou agasala e mafai ona togilaina ai i tatou. Na maluu le Alii e lavea'iina i tatou mai a tatou agasala. I le pisi o loo tatou olaga, e ono faigata ai ona vaai ma fa'alogoina i le mea o lo'o ta'ita'iina ai tatou e le Alii. E fa'aali mai o Ia i auala ese'ese ia i tatou ta'ito'atasi. Mo nisi o tatou, e lagona se leo i totonu i ai tatou, o isi e faailoa mai e ala i fa'aaliga ma miti. O lo'o tatou olaga e mo'omia ai ona fa'aavanoa sina taimi ina ia na ona e filemu ma tatalo e fa'aali mai o ia i lou olaga. O nisi taimi na te fa'aalia o Ia i ni auala laiti.

"Ia to'amalie ma iloa o a'u o le Atua." e faamanatu mai ia te a'u ia ou nofo filemu ma usita'i. Aua o lo'o galue lava o Ia e tusa lava pe le mafai ona ou va'ai i ai. "Afai e te mana'omia le poto, fesili i lo tatou Atua agalelei, o le a ia avatua ia te oe, AMENE.